

# Timotehopi Utipiho Jiho

## Kimandi 1 Timotehopi Utipimandapi Nesipihande

Timotehomi sanaati saati isihiya Judaahiyaamihaate. O komi sapihohi isihiya Judaahiyaami dawaapipihi bimohiyihiya Girikihiyaamihore. Timoteho so Poriho Jisaasihopi piwiha ausaati katihi Timoteho piwiha atisati neti waapoho nehore. Ko siyati kaihi Poriho koai usonataati koai numwaati komi mwaahoaisamatiyati iwinjaati bindataise. Komi utipiho Timotehopi jiho jipatipaisiho napwitopipihi napwitati bindataati jipatipiyahomahe owetise. O Komi utipiho kapiho Timotehopi jipatipaisiho napwitopipihi napwitati bindataati jipatipiyahore. Aihi isihiya usa Porihopi Romihanda nehi naasaaraahi napwitataise tiwi gwinyaawaayopo. Aihi ami usa Porihopi Romihanda yataira napwitataise tiwi gwinyaawaayopo. Ko nehi naasaaraahi napwitonaahi akite ami komi utipiho Timotehopi jiho jipatipiyataise 64 A.D. hura jipatipaiso. Iyataati ami ko Romihanda yataira akiti napwitonaahi akiti jihapihandi napwitataise taati gwinyaitanihe. Iyataati ami ko aimi noaipasi nehahaati bindataataahi 66 A.D. hura utipiho jipatipiyataise taati gwinyaitanihe. Iyataati Timoteho so isihiya Autaahaatihopi giwunyaahohiyihiyaami mitiho jihondaati sosihaiwa kihaiwa kihaiwaami ndiheti isihiya giwunyaahohiyihiyai titihi daihira nunjati kaimi notaise. Aihi sandapi Poriho Autaahaatihopi giwunyaahohiyihiyaapi jipatipiyati Timotehopi nusoasataise.

## 1 Timotehopi Piwiha Napimasataise

Poriho Timotehoai ipihirete undisiha (1:1-2)

Timotehoai Poriho winihapipa nunyati Autaahaatihomi piwiha akitiha saimbi saimbi ausaapi kaunde undisiha (1:2-20)

Kiraisihopi giwunyaahohiyihiya saiwi saiwi Autaahaatihopi aunihihiri katiwi gaapunditaatiwihandapi kaundisiha (2:1-15)

Autaahaatihomi isihiyai jihimatiwi iwinjatitaatiwihiyai namihandihawaahi kiyaami bimohirihireti kiyaami daayohirihireti piwaatohirihireti titihi gaahaiwaahihi kaiwihiyaisi namihandihawaawe undisiha (3:1-16)

### Poriho Ipihirete Ndaase

**1** <sup>1-2</sup>Timotehonye nini gisi Jisaasihopi ausaati kahitoni giwunyaahingitihanda noaipapi nisi maasihihonjimatingihonye, utipihandi kimandi kinyapi jipatipiyataayo. Iyataati nini Porihonini Kiraisi Jisaasihomi aposerihonini komi piwiha naninyati isihiyaisi ausaati kaunditandi natanoaasisihonine. Iyati Autaahaatiho nyangisi japihi nanyamaati nyainjatisihomuni ami Isihiyaisi Japihi Numwaati Iwinjatitandi Autaahaatiho Ahiwisiho Kiraisi Jisaasiho nyahi komi ndimaahomwaaŋi usondihaawi jatotihomi piwihaara ningi komi aposerihoninimatitandi ahinisihonine. Nyami Apiho Autaahaatihouni ami nyami Awaisiho Kiraisi Jisaasihouni gisi gaahandi kahimi nahinyami, ami nepi gisi anditihipi maariho jinjapihi asipaindihanduni nahinyami nangimaaspise.

### Isihiya Piwiha Asiwa Isihiyaisi Sapihi Katiwunjohiyihiyaisi Kinyi Itihundipi Nepi Nuwisapupe

<sup>3</sup>Isihiya usa Autaahaatihomi piwiha nyahi ko natanyoaaasisawihyaanini newaati isihiyaisi katawaunjohiha sehimwaaŋi sapihi Epesaasihanda isihiyaisi asiwa katiwunjauhi mmonataati kandapi nini gisi watipindi kahititi kinyi kiyaisi itihundipi nepi nuwisapuwitaapi bime hititimapi jihura nini Masetoniyahandaahapi niyo. Sandapi kinyi konjinihi gwinyaapi kaimi nutaapi jahira anditihiti watipindi kahitataato. <sup>4</sup>Aimbi kiya kiyaami saisa satoyaami nehi piwaahaiwauni ami saisa satoyaami jitipati japepihiriwi ambipati nepi kaniwi isiwatawaawi isihiyaisi taawi katiwunjohiwaiwa namaita kinyi kiyaisi saunde, sahi saiwa namapi isihiyaisi windi kaundiwi katiwimunjawise undipi kaunde. Sandi gisi apaapimaahito, isihiya siya isihiyaisi nehi kiyaami saisa satoyaami piwaahaiwauni ami ambipatapuni katiwunjohiwiwa piwiha akipipa owehaiwa nehi taanauhiihaiwa neti namoyaati Autaahaatihomi piwihai isihiyaami omanjititihapi nemati ami isihiyaisi Autaahaatiho kahapaamapipa kawitandi gwinyaati katati neti timanimbipaami daihira isihiyaisi windi neti namunjitaihito. Nehi Autaahaatihopi giwunyaahohitihandaahihi Autaahaatiho kahapaamapipa isihiyaisi kawisati nunjitandi gwinyaati katati neti timanimbipa isihiya mmonawaayopo. <sup>5</sup>Iyataati kimandi utipimandi nini kinyapi jipatipaindi winihapipa piwiha kahititi isihiya sapihi isihiyaisi saisa satoyaami nehi piwaahaiwa katiwunjohiwaiwa namaita kaunde hititi kahitohitindi apaapimaahie, kiyaisi kinyi kaundisamihi kiya kaiwa namaitaatiwe. Iyataati ami nini saindi maaritataate, omanjititihipi maariho gaahoaatihapuni maarihomi amitiha gaaha saasanotaha gwinyaasitihandaatihapuni sapihi Jisaasihomi isihiya maariho namindaatiwihandi nepi namoyaapi

awaindemapi kiya maariho namindaatiwe. <sup>6</sup>Sapihi isiya saisatoyaami nehi piwiha taanauhiihaiwa aripi yapepiho isihiyaisi katiwusohiyihiya saiwa saiwi kaitaatiwiwa namasi daihira asira asireti kiya niyopo. Saiwi daihira akirihira namasi asira asireti nuwi nehi piwiha taanauhiihaiwaahihi katiwi kanawaayopo. <sup>7</sup>Aiwi kiya Autaahaatihomi piwiha winihapipa isihiyaisi katiwunjitaatiwihiyaimatitaatiwi maariho nusoasawaayopo. Aiwi kiya satawaatopo: nyahi isihiyaisi piwiha katawausohiha titihi akitihe tiwi katawaayopo. Kiya satawaahandi kandi sawanaami piwihaami tanyaaha windi baiwi mohopo. Owetise.

<sup>8</sup>Ami sandi Autaahaatiho komi winihapipa gaahape tati nyangisi nanyisihii nyahi aimi mmonaahiyaanine. Iyati ami nyahi komi winihapipa newaati nehi asoya asisaami piwihaamatiyaati yawanaanami gwinyaahohirihireti tiwitapaawaati kamaataati Autaahaatiho sawaho katirihireti japepihirihaawaahi kapa nyangi nyatatamanitaiho. <sup>9</sup>Ami nyahi biyaati mmondahaawo isihiya titihi gaahiya Autaahaatihomi gwinyasirihireti daayohiyihiyaapi winihapipa Autaahaatiho ahiyataamaise. Owetise. Isihiya kahapaamapipa gimunyaatihaiwa maipihaiwaisahiyaisi sahi saiwa saiwi maipihyaate undati ausaati nunjitandi Autaahaatiho winihapipa ahiyataise. Iyataati isihiya maipihyaapi winihapipa ahiyataise. Iyataati isihiya maipihyaapi winihapipa ahotisawihiya usa siyaape: winihapipa nemapi atihomiwihiyaapuni ami Autaahaatihomuni isihiya awaisawihiyaami otitihii yatihii apipaahi windi pinamuwihyaape. Iyati Autaahaatihoai ahosumwapi komihaiwaapi windi gimunyaapi maipihaiwa kaiwi maipihyaape. Iyati isihiya kiyaami omanjititihii asihatati ainjotahaiwa gwinyaaapi kaiwi ami Autasahaatihomihaiwaapi sisipihitiwi kahitiwi noamahohiyihiyaape. Iyati isihiya saniya sapiyaisi nepi nusopisasiwi ami tiwohiyihiyaape. Iyati ami isihiya isihiyaisi nepi nusopisasiwi timahohiyihiyaape. <sup>10</sup>Iyati isihiya kiyaami omanjititihii apipaahi ainjotati nopisasinati isihiya kihiyaisawi kainniwi daayohiyihiyaape. Iyati usihiya usihiyaisawi kainniwi ami asihiya asihiyaisawi kainnihohiyihiyaape. Iyati isihiya isihiya usaisi topitaata namanjindiwi ikoniwi asihiyai nepi wiraitaatiwuni ami isihiya otipipa kawitaatiwihiyaisi numwaapi ipatisawi napuhohiyihiyaape. Iyati isihiya jaipipaisahiyaapuni ami isihiya isihiya usaisi nepi nusopisasitaatiwi gwinyapi piwiha tipitapaapi mmonihohiyihiya nunjehauhi akiti katahaato tiwi jaipitiwihaiwa katohiyihiyaape. Iyati ami isihiya usa Autaahaatihomi piwiha titihi akaaha ahotirihireti japepihiriwi kamaiwi kiyaisi asireti wapa kahapaamapipa kaisaihihiyaape. Isihiya saisaihihiyaisi sahi saiwihiyaate undati kiyaami maipihaiwa neti awusaati nunjitandi Autaahaatiho winihapipa ahiyataise. <sup>11</sup>Iyataati Autaahaatihomi piwiha akaaha sa Jisaasiho kataunjati kaiwaiwaapiha gaaha piwiha ningi sawaho

nanimihi neti sangisi kasatohiha naasa kima kaare. Iyataati piwiha sa Autaahaatiho apipaahi saasanotahopi ausaataise.

**Autaahaatiho Ningi Maariho Asipinisati Ami Komi Otipipati  
Kawitandi Nanimindihandapi Koaisi Gaare Undataato**

<sup>12-13</sup>Iyataati jihura nini Jisaasihoai neti mimaipiwindi maipihaiwa kaunditi koai naanijhaiwa nunyatihonine. Saindi koaisi kawindihoninitihandani kandi ko nyami Awaisiho Kiraisi Jisaasiho nisapi ko nisi otipipati kanitaiso tati nisonati naninyati komi otipipati anditindi kawitandihati anditati naninyataise. Aihi nini koaisi jinjahira gaare unditandihandani neti taati gaare undimi notaayo. Iyataati ami saiwa nini jihura maipihaiwa Jisaasihoai asakaindi kawisonihandani kandi Autaahaatiho mmonataati nini Jisaasihopi apipaahi gimaawunyaati naharindi kiyonihi namati ningisi ko maariho asipinisataise. <sup>14</sup>Iyati nini utaahonini apipaahi maipihonini wapa namaitihoninitihandani kandi nyami Awaisiho komi gaahandani nahandani kandinihi naninyati ami Kiraisi Jisaasihoaisati nini timaamaitohitihanda giwunyaati maariho numwitandihandani naninyataise. <sup>15</sup>Piwiha kima nini katitandiyohima apipaahi akitinihi akaahaasi isihya akitinihi akite tiwi naitaatiwihaare. Iyataati piwiha saapito, Kiraisi Jisaasiho isihya maipihiyaisi japihi numwaitandani yamihapati namasisi yapipataapihi nasataise tati nyamihatihani daayati ahotihahaapito. Iyataati isimiya maipimiyaami nyepembi apipaahi maipihonine. Sandi Jisaasihomihiyaisi neti nusopisasiti maipihaiwa kaunditi kawindi naanijhandani nunyohitihandahe. <sup>16</sup>Nini utaahonini apipaahi maipihoninihi Autaahaatiho maariho asipinindinda isihiyaisi kopi giwunyaitaatiwihyaapi nisihetapi kimandani nunjitande, nini maipihoninitihandani kandi maariho asipinisati nisapi satati, ko japihi nepemaita ginunyaito tati ninjatimi naindihandani Kiraisi Jisaasiho neti kopi ipoti giwunyaapi jinjapihi bimitaatiwihandani naitaatiwihiyaisi ningi kanirihireti kawitandani nunjitande. <sup>17</sup>Isi Awaisiho windi namaapoti windi ndihaara motinani nehi Autaahaatiho naasohihi kahapaamapipaisuni isihiyaisuni jinjapihi konihi iwinjatimi naisihoaisi nyahi isihyaanini newa mihaati autaahi nuwaataati isiwatihawwi koaisi kiyaaninihi jinjapihi jinjapihi mepi autahewaumwaitihaawo.

<sup>18</sup>Nisi maasihononi Timotehonye, piwiha kima winihititi Autaahaatiho komi otipipatihyaami maahomwaaapapi piwiha ausaati kahitisihaamataindi kireti gisi kahitataato. Isi piwiha sa kinyi nepi kinyi pwisipi yaipatemapi isiwatapa Autaahaatihomi piwiha winihapipaami isihya tiworisaisapi baimbi tunnipi yahwinime. <sup>19</sup>Saimbi tunnipi yahwinipi kinyi Jisaasihopi giwunyaahingitihanduni ami kinyi maarihoatihani titihani gaahandihani gihunyaatindihanduni isiwate. Isihya

usa kiyaami maariho piwiha kaundati neti giwunyaasiha atihomisawaawi kiya Jisaasihopi giwunyaahohitihandi nepi nopisasiwi namahopo. <sup>20</sup>Iyataati sandi siyohiyihiyaamihatihahi wuri kimure: Aimeniyaasiyi Arekisandaayaare. Surisi nini Jisaasihomi watipihandaahi neti Bwaasirihirami ikwiraatihemataayo, kirami watipihandaatihahi bindamaami Autaahaatihopi windi sisipihimaatitaatimihandi mmonimi naitaatimo.

### Isihiya Nahatiyaapi Gaapiwunditaatiwi Piwiha Winihapipa Kasatataato

**2** <sup>1</sup>Piwiha kima watipihahi sahi baiwi atiwi gwinyaapi kaitaatiwiha kasatitandiyoni atiwise. Sahi Autaahaatihopi isihiya yapipati nahatewaara nahatiyaapi gaapiwundiwise. Aiwi wapa sawanaatangi jatatamanitandi gwinyaawaahapaapi Autaahaatihoi nunjepi kaundiwise. Aiwi ami isihiya usaisi wapa iwitatamanitandi sahi gwinyaawaahapaapi Autaahaatihoi nunjepi kaundiwise. Aiwi sahi sangi wapa jatatamanitandihaiwa nasamiwaiwaapi Autaahaatihoi gaare undiwise. <sup>2</sup>Aiwi sahi Autaahaatihopi isihiya awaisawihiya mitihiya jihiyaapunani ami awaisawihiya nahatiyaapi gaare undiwi gaapundiwise. Kiya nyangi baiwi nyainjaawi binyaihi nyahi bipi napaisaati bindahaawi ami Autaahaatihopi biyaati giwunyaawaati titihi gaahiyaanini bitotahaawi komihaiwaapaahaitihaawo. <sup>3</sup>Ami sandi nyahi siyaati kaitihaawi Autaahaatihoi nyangi japihi nanyamaasiho maaritataise. <sup>4</sup>Iyataati nyahi isihiya nahatiyaapi gaapiwundaati ami titihi gaahiyaanini bitohonihahi Autaahaatihoi nyangi japihi nanyamaasiho mmonataati sandapi maaritataise. Ami ko isihiya nahatiyaisi japihi numwaahonihahi noaipapi komihiyaimatiwi komi piwiha akaaha nahata mmowi nusesipatitandi maaritati gwinyaahoso. <sup>5</sup>Iyataati Autaahaatihoi nehi naasohihi bindataise. Iyataati ami utaaho isihiya Autaahaatihoi isawiji japihi piwaniwi naisihiyaimatitaatiwihira daihira daahiwati otihapihahi naasohihi bitondaise. So utaaso Kiraisi Jisaasihore. <sup>6</sup>Autaahaatihoi isihiyaisi maipihaiwaatihapi japihi numwaati sawahoaisawiji timaamaititaatiwihandapi gwinyaataati sura kaitando tati katati timanati ahaisiha asisiha noaipasihi kura Jisaasiho komi ambipati gaahati maipihandaahihahi nesi nandaati sawahomi ambipati kataahi isihiyaisi maipihaiwaatihapi japihi nuwati numwaataise. Jisaasiho sandi kaimandahaahi Autaahaatihoi isihiya nahatiyaisi japihi numwaitandiyoni nyatati nyangisi neti nanyisataise. <sup>7</sup>Maipihandaatihahi Jisaasiho komi ambipati namati isihiyaisi japihi numwaasitindapi piwiha ausaati isihiyaisi kaunditandi Autaahaatihoi ahinihi nini aposerihoninimatataayo. Sa piwiha nini akiti kandaato. Nini windi jaipindaamaato. Owetise. Isihiya Judaahiyaanami dawaataati bimohiyihiyaisi komi piwiha akaaha nahata ausaati kandunjisanihahi noaipapi Autaahaatihopi giwunyaitaatiwi Autaahaatihoi komi otipipati piwiha naninyati ahinihihionine.

**Isihiyaati Nahatiyaati Ahoyanawaahapihi Usihiyaati  
Asihiyaati Wapa Kaitaatiwihapaapi Kasatitaano**

<sup>8</sup>Iyataati sahi usihiyaati titihi gaahiyaati saasanotahiyaati sami ikwiri naimaapi sami aposati itihitohiwaiwa namapi Autaahaatihopi gaapundiwise. Sandi usihiya yapihahi nahatewaara saiwi kaitaatiwi nini maarititi gwinyaataati sangisi kasatataato.

<sup>9</sup>Iyataati ami nini ashiya kiyaami apotihiri yutihiri konaarapiho yundanyaaha niyopi namaasatiwi naahipiwi niwi yundanyaayohhipa yatihahi ipatisaniwi baiwi mmotiniwi kaiwise ndi nisi maariho gwinyaahohitihandi ausaati kandaato. Iyawaawi kiya genaniwi ishiya usaisi nyahi setahiyaanine tiwi kiyaami ambipati nunjaaniwi kahapaamapipa apipaahi gaahaiwa windi yundanyaamawise.

<sup>10</sup>Iyawaawi ashiya Autaahaatihopi baiwi giwunyaahohiyihiya kiyohirihireti ashiya baiwi japepihiriwi kahapaamapipa gaahaiwa kaiwi yundanyihaamataiwi nepi yundanyaiwi ishiyaisi nunjawise. Saiwi kaiwi saiwa ashiya baiwi isiwatawaawi ishiya Autaahaatihopi giwunyaahohiyihiya koaisi mepi autaahemwapi piwaunditaatiwi ahoyainjaihihapihi kiya napaitiwi kaitaatiwe.

<sup>11</sup>Iyawaawi sapihi ashiya kiyaami maahomwaaŋi windi namusaapi yatihahi ipatisaniwi Autaahaatihomi ishiyaami mitihiyaami otitihahi pinuwi bindawaawi piwiha atiwi mmoniwi nepise. <sup>12</sup>Iyataati ami Autaahaatichoai mepi autaahemwapi piwaunditaatiwi ishiya ahoyainjaihihapihi ashiya ushiyaisi yatihahi otitihemapi windi ishiyaisi Autaahaatihomi piwiha katiwimunjawise ndi nini itihindi owe ndaato. <sup>13</sup>Sandi apaapimaato, Autaahaaticho Adaamihoaisi jihahi kiyati ahiwihahi nehi sawahohihi bisotimi naihi namati Autaahaaticho Ewaahaatishi Adaamihomi ambipatetapi neti kiyati ahiwisataise.

<sup>14</sup>Iyataati ami Bwaasirihirami piwiha jaipipa Adaamiho windi atisa nameese. Owetise. Ewaahaati apopaatihihahi piwiha jaipipa atisati netaati kandaahi Autaahaatihomi piwiha winihapipa wapa neti nopisasati maipihandaatihahi nandaati timahaise. Siyati apopaatihihahi Adaamihomi ambipatetapi noaipati ami kaatihihahi jaipipa atisati neti timahaindihandapisato. <sup>15</sup>Ewaahaati maipihandaatihahi timahaindihandaahi ashiya nahatiyaisi kiyaami ambipati yaawihandi maaha namoyaitaatiwihandi Autaahaaticho numwihahi kiya apipaahi mimaipaiwusaasanohiyihiyaamatetawaayo po. Ashiya setawaahandi kandi kiya maaha namoyaapi manyinyai yamanawaawi Jisaasihopi giwunyaapi ami maariho nunyawahi namindaatiwihandi nepi isipi titihi saasanotahiya daiwi yatihahi ipatisaniwi napaisaati bindawaawaahi kiyaisi Autaahaaticho apipaahi kiyaisinihi numwaitaise.

**Isihiya Jisaasihopi Giwunyaahohiyihiyaisi Awaisawihiya  
Iwinjatohiyihyaapi Piwiha Kahititaano**

**3** <sup>1</sup> Piwiha kima nini katitandiyohima apipaahi akitinihi akaahaasi isihiya akitinihi akaahaasi akitihaare tiwi naitaatiwihaare. Iyataati piwiha saapito, ami utaaho wo isihiya Jisaasihopi giwunyaahohiyihiyaisi awaisihoematati iwinjatitandi maaritataataahi ko sati otipipati gaahatapi gwinyaati maariho windotaise. <sup>2</sup> Isi ami utaaho wo Jisaasihomihyaami awaisihoematitandihio isihiya koaisi ikwiwitaatiwihapa wapa ahimotati titihi anjini saasanotaho bitohotane. Iyati ami apopaati nehi naasaamihisati kaatisaahihi maariho nunyati bimohotane. Iyati ami utaaho mwitipisati bimoti kahapaamapipa napaisaati kiyati sawaho biyati jatinati daihira gaahira daahiwa japepihirati, ami komi kahapaamapipa gwinyaati katati kaiwaiwa isihiyaisi giwunyaatati nusesipatahaiwa kiyahotane. Iyati ami Autaahaatihomi piwiha ko biyati mmona neti titihi nga kataunjahotane. <sup>3</sup> Iyati waapoho watipihio isihiya naniwi naharitaatiwiho ko windi nanati naharimisahotane. Iyati ko topitaata winamaatihi maaitaatihiri kiyati itihitati isihiyaisi tiwati windi timunahotane. Windi samaayati ami bipi napaisaati isihiyaisi iwinjahotane. Iyati piwiha pwisipa yaipatamatiyati nuwati neti katati windi tunna yahomunahotane. Iyati ami ko nawihopi apipaahi maaritati maariho windi namunyahotane. <sup>4</sup> Iyati komi anjaani apwaataati manyinyaisi biyati iwitatamanati winjatahotane. Iyati ko komi manyinyaisi asimwaatitihemahonihi kiya bipi nanihaiwi koai nepi autaahemwapi iwiwatawa baiwi atiwihotane. <sup>5</sup> Sandi nini apaapi kandaamaato, ami utaaho komi anjaani apwaataati ami manyinyaisi biyati windi maawinjataho Autaahaatihomi isihiyaisi ko napitiyati iwitatamana iwinjatitaisono. Apipaahi owetitaise. <sup>6</sup> Iyati ami ko ipaahambi nehi wani konihi noaipati Jisaasihopi giwunyaati Jisaasihomi isihyaamihatihii nasati nandaahometane. Ami wiwa ko genanihonihi Bwaasirihiri siyati genanihi Autaahaatiho kirisi, 'kinyi naanjihandi naitaapo,' undati nehihaati nemasipatamatiyati koaisi Autaahaatiho kati kawitaiso. <sup>7</sup> Iyati ami ko utaaho apipaahi titihi gaaho saasanotaho isihiya Jisaasihomi isihyaami ipaahaapi dawaataatapihiya ko gaaho saasanotahoe tiwi titihi nehi gaahaahihi kopi kaniwi katiwihotane. O ami isihiya ipaahaapi dawaataatapihiya kopi windi gaahaiwa kaniwi gimaawunyaapihondaataahi komi ambipati neti nopisasinati koaisi mawitaise. Siyonihi kaiwetapi Bwaasirihiri koaisi neti nusopisasati komi otipipatami daihira neti nuwisapuwitaise.

**Isihiya Jisaasihopi Giwunyaahohiyihiyaisi Ikwiri Nunyawii  
Anditiwihotatiwihandapi Piwiha Katitandiyoo**

<sup>8</sup> Iyataati ami isihiya Jisaasihopi giwunyaahohiyihiyaisi ikwiri nunyawii anditiwihohiyihiyaisangi siri kireti naasaipiti kaiwise. Kiya

isihyaami ndiheti kiyaami ambipati dahopa baiwi isipi jatiniwi titihi saasanotahiya bitopihyaatiwise. Aiwi ami kiya isihya usai wa kaundiwi ami usaisi wa wipitiwiha kamundiwi nehi naasaahi ka nahatiyaisi kaundiwihiyaatiwise. Ami waapoho watipiho mitaahi pihitiwi naniwi windi naharimiwihiyaatiwise. Aiwi ami kiya nawihoaisi maariho nunyawu wapa wapetapi ikoniwi aipi naitaatiwi gimunyaapihyaatiwise. <sup>9</sup>Aiwi ami kiya Autaahaatihomi piwiha akaaha nahata nyangi aimi ausaati nanyisih nyahi newa gwinyaahohiha andititiwi isiwatiwihiyaatiwise. Aiwi kiya titihi saasanotahiya daiwi kiyaami ambipati dahopa isipi bitohohitihanda kiyaami amitih maariho saasanotindihandaatihi sandi nepi kipiwi isiwatiwihiyaatiwise. <sup>10</sup>Isihya siya Autaahaatihomi isihiyaisi ikwiri nunyawu anditiwiwitaatiwihiyaami piwiha dahopa otipipati kaiwi daayohiwaiwa jiji tipitapaapi usowi gaamapi japwaapise. Saiwi japwaapi mmosaihi piwiha kiyaamiheti yamwaitandiha wapa ahimotati apipaahi owetanaahih kiya gaasi otipipa nepi kaiwise. <sup>11</sup>Iyataati ami kiyaami apwaatiyaisangi isihyaami ndiheti kiyaami ambipati dahopa baiwi isipi jatiniwi titihi saasanotahiya bitopihyaatiwise. Aiwi ami isihya usaapi piwiha maipihaiwa kiyaisi nepi nusopisasiwihaiwa dawaataatapi asihya siya apipaahi windi kamaatiwihiyaatane. Aiwi ami kiya baiwi mwtipisawi bimaawi ami kahapaamapipa kiyaami ikwiraatihi ahotanihapa baiwi isipi kaiwi jatiwihiyaatane. <sup>12</sup>Iyataati ami Autaahaatihomi isihiyaisi ikwiri nunyawu anditiwihohiyihya apopaati naasaamih naasaamih kaatisaahih maariho baiwi nunyawu daiwi bitopihyaatane. Aiwi ami kiya kiyaami añaani apwaataati manyinyaisi baiwi iwitatamaniwi iwinjatiwihiyaatane. <sup>13</sup>Isihya Autaahaatihomi isihiyaisi ikwiri nunyawu anditiwiwitaatiwihiyaimatiwi otipipati gaahaiwa kiyohiyihya isihyaami ndiheti gaahya noaipati ambipati gaahati newaayopo. Aiwi ami kiya nga andititiwi Kiraisi Jisaasihopi giwunyaapi windi yamaiwi nehi nanihaiwi komi piwiha andititiwi ausaitaatiwihandi newaayopo.

**Autaahaatihomi Piwiha Jisaasihomihetapi Ausaimaninjha  
Apipaahi Awaisiha Kinyi Ikwiraatihi Ahotisiha Watipihaare**

<sup>14</sup>Nini gisi napiti gisondandi taati gwinyaataahonini konini utipihandi kimandi jipatipiyataayo. <sup>15</sup>Nini keti windi namaapisanaahi piwiha utipimandaatihi kinyapi jipatipiyohima nyahi Autaahaatihomi isihyaanini daayaati bitoitihahiretapi nahisitaise. Iyataati Autaahaatiho asohomi isimiyaanini komi piwiha akaaha nahata Jisaasihomihetapi noaipati ausaimaninjha newaati autaahi isiwatahaawi isihiyaisi nunjonih mmoniwi newaayopo. <sup>16</sup>Iyataati Autaahaatihomi piwiha akaaha nahata Jisaasihomihetapi ausaimaninjhi nyahi aimi mmonaati nehohihaapi nyahi satahaato, ese piwiha sa



awaisiha watipihaare, tahaato. Iyataati piwiha aimi ausaimaninjha saare. Autaahaatiho komi Mwaaho Jisaasihoai natausaasihi nasati isihyaami ambipati neti utaahoematataise. Aihi nyahi isihyaanini koaisi usonahaayo. Ushonihhi isihyaanamihatihhi bindataati otipipati awaiwaiwa watipihaiwa kiyataise. Iyati ko kahapaamapipa nahatewa otipipati Itipihho anditiwisihi koraahi kiyataise. Iyati ko napwihi Itipihho anditiwiwati ahowimati numwaasihi nepasi yamahipataatihhi niyati Autaahaatihoaisati Awaisihoematati bindataise. Aihi kopi saiwaaraahi Itipihho ausaati titihhi akitinihi Autaahaatihomi mwaahoe tati nanyisataise. Iyataati Autaahaatihomi otipipatihya yamahipataatihhi bimohiyihya sandapi awaindihandi kiyaami maariho windosihi ese tiwi mangiri ikwiri ikwiniwi mmonawaayopo. Iyataati Jisaasiho Autaahaatihoaisati Awaisihoematati yamahipataatihapi kahapaamapipa nahataapaisi iwinjatimi notaise. Aihi nyahi kopi giwunyaahohiyihyaanini maapi isihya yapipati nahandaahiyaisi piwiha kopi ausaawaati kaundonihhi atisawaayopo. Atiwi ami isihya yapipati nahandaahiya kopi giwunyaapi japepahirawaayopo, taati nyahi piwiha sa gwinyaawaati isiwatahaayo.

**Isihya Piwiha Jaipipa Isihyaisi Katiwunjohiyihyaapi  
Nini Wapa Kahititandiyu**

**4** <sup>1</sup>Iyataati ami piwiha akaaha nahata nyahi newaati isiwatohihaapi Itipihho Gaaho titihhi auta satise, asisiha ipotihaiweti isihya kiyaami Jisaasihopi giwunyaahohitihandi namaitaapo, tise. Iyataati kiya itipihho maipihaiwa kiyaisi piwiha jaipipa kaundiwaiwa atiwi nepi kipiwu japepihiriwi isihyaisi katiwunjawaayopo. <sup>2</sup>Saiwa isihyaisi jaipipa katiwunjohiwiwa nehi isihya jaipitiwihyaamiheti itipihho maipihaiwa neti wiwisihi kapihapi nasahaiwaare. Iyataati isihya siya kiyaami amitihha maariho gwinyaitaatiwihandi saampihho maipihho neti nanati owemasihyaare. <sup>3</sup>Iyataati isihya siya satiwi, isihya windi namaamaatiwi ami nandapa wapa wipetahapa windi gaamaahe, tiwi itihitiwi nisapupwi katiwunjawaayopo. Ami kiya sandi maipihandi kiyawaayopo. Saiwa nyahi Autaahaatihopi giwunyaawaati komi piwiha akaaha nahata nehohiyihyaanini koaisi gaare undaati maaritaati newa kiyaati nandihawwi Autaahaatiho ahaihihaiwaare. <sup>4</sup>Iyataati nyahi aimi mmonaahiyaanine kahapaamapipa nehi gaahapaahihhi Autaahaatiho kiyati ahaiho. Isi nyahi kapaami wapaapi maipe taati tipitapaawaati newaamaamaitihaawo. Owetise. Ami nyahi nahataapaapi Autaahaatihoai gaare undaati maaritaati naitihaawo. <sup>5</sup>Iyataati ami nyahi Autaahaatiho satisiha, 'nahataapa nini ahoyohipipa gaahapaahihe,' tisiha newaati gwinyaawaati ami koaisi kapaapi nyahi gaare undaati gaapundohitihanda kapa noipati Autaahaatihomi ndiheti gandaise nyahi naitihaawo.

**Kinyi Kiraisihomi Otipipatihonji Gaahonjimatinihi  
Konjinihi Kaimi Nutaapi Nini Anditihiwataayo**

<sup>6</sup>Iyataati ami isihya gisawi maawi Jisaasihopi giwunyaahohiyihiyaisi piwiha winihapipa kimaiwa kaundipi katipunjapaapaahi kinyi konjinihi Kiraisi Jisaasihomi otipipatihonji gaahonjimatitaise. Ami saimbi otipipatihonji gaahonjimatitaapi Autaahaatihomi piwiha Jisaasihomi kaiwaiwaapiha nyahi aposerihyaanini sahi isihyaatangi titihi biyaati katawaasasonihi Autaahaatihomi isihya nepi isiwatohiha kinyi nepi japepihiringiha nandapaamataimbi konjinihi nanimi numwe. <sup>7</sup>Aimbi mambi saisatoyaaami nehi piwaahaiwa Autaahaatihomihaiwaisi ipihatiwimapi isihya nepi kaniwi isiwatohiwaiwaisi nemapi nawisapi bitose. Aimbi kinyi Autaahaatihomihaiwa mmonipi nepi kaimbi bitose. <sup>8</sup>Kahapaamapipa nyami ambipati gaatati jitipati gaahati winyaititandi kiyohiwaiwa gaahaiwaasi nyangisi masehonji nyatatamanitaise. Iyataati ami nyami ambipati maariho isiwaati Autaahaatihomihaiwa mmona newaati kiyaati bitotihawaahi sandi apipaahi gaahande. O napaapono, sandi apipaahi akitinihi wani maapi itatamaninaati biyaati bimitihaahandi nanyinyati ami ipoti Autaahaatichoisaati apipaahi kiyaaninihi bimitihaahandi nanyamitandihanditihito. <sup>9</sup>Piwiha sa apipaahi akitinihi akaahaasi isihya nahatiya atiwi nepi japepihiriwi ami baiwi gwinyapendaatiwihe. <sup>10</sup>Iyataati ami Autaahaaticho satati, 'nini isihya nahatiyaisi japihi numwaati iwinjatitando,' tati gwinyaati ami aimi kopi giwunyaahohiyihiyaanangi japihi nanyamaati nyainjatisihore. So Autaahaaticho asohopi nyahi ko gaahaiwa siyati saiwa kanyito taati aimi giwunyaawaati jatimi nohaawi sandapi nyahi waati andita napawaamawa otipipa kopi kiyahaayo.

<sup>11</sup>Isi saiwa kahitohiwiwa kinyi isihiyaisi winihundipi kaundipi ami katipunje kiya japepihiriwi kaito. <sup>12</sup>Isihya gisi gisonawaawi utaahonji waimwahaonjitanihi kandapi kinyapi kiya satiwi, ko nehi utaahoso, tiwi ginjapi windi maahisopise. Owetane. Isihya gisi windi samaahitaatiwi kinyi isihya Jisaasihopi giwunyaahohiyihiyaisi komihyaametohirihireti nunje mmonda. Aimbi sandi kinyi piwiha piwaatipi piwaundipi ami katingiwaiwaraahuni dahopaaraahuni maariho numwingitihandaahuni Autaahaatihopi giwunyaahingitihandaahuni ami titihi gaahonji saasanotahonji bitohingitihanda isihiyaisi Jisaasihopi giwunyaahohiyi hiyaametohirihireti nunje. <sup>13</sup>Aimbi napisanihapi jatapaapi Jisaasihopi giwunyaahohiyihiyaati ahoyanawaahura kinyi Autaahaatihomi piwiha auta awitipi piwiha isihiyaisi anditiwiwitandihaha ausaapi kaundipi ami baiwi mmowi naitaatiwi nesipapi katipunje. <sup>14</sup>Iyapaapi Jisaasihomi isihyaami mitihya gisi ikwiri ahingisauhi Autaahaatihomi Itiphoetapi gisi anditihiwitandihandi apipaahi nehi nahimindihandi sandi kinyi

korjinihi baimbi isiwatapa kandaahi otipipati kaime. <sup>15</sup> Aimbisaiwa kaime hititi nini gisi kahitohiwiwaatihikinyi anditatisisi nahatoji nandaapi katihibitotapaapi japepihiripi kaime. Saisamihi kinyi otipipatinga waati awaipati noaipapiniyonihisisihyagisigisondo. <sup>16</sup> Iyataati amikinyi ambipati baimbisisipibitopi amisisihyaisikatipunjingipipa baimbimmonipijatinipikatipunje. Aimbisaiwa andititipikinyi isiwate. Sandi apaapimaato, amikinyi siyapaapaahi kinyikiwahongisuni amisisihyagisiatihisohiyihiyaisuni Autaahaatiho netijatatamanihonihisahinoaipapi apipaahi komihyaatimatitaatiwito.

**Jisaasihopi Giwunyaahohiyihya Napepaasaihi  
Titihepumwaitaapihandapi Nini Kahititandiyo**

**5** <sup>1</sup> Usihya aunihiya napepaasaihihiyai kinyi windi wonamaatihitihimundime. Owetise. Kiya napepaapi timahiyohitindaatihapijahira nepemaititaatiwi kinyikiwahonyigapihoai kawitatamataimbibipinapaisaati itihundipi kiyaisi anditiwipititihepumwape. Aimbiami waimwaaya kinyahuraahiya napepaasaihihiyaisikiwahonyigaatiska winyihoyai kawitatamataimbiritihepumwape. <sup>2</sup> Aimbiasihya aunihiyanapepaapi timahaisaihihiyaisikinyikiniyaamataimbiritihepumwape. Aimbiami asihya apwainyihya napepaasaihihiyaisikinyikiwahonyikinaanisa kinaapwisaisikawingipatamataimbisaasanotahaiwaahihi gwinyaapiritihepumwape.

**Asihya Osinihiyaapi Gwinyaitaapiha Kima Kahititandiyo**

<sup>3</sup> Asihya osinihiya kiyaami manyinya aminaisihyaisangi apipaahi owehiyaisi Autaahaatihomi isihya baiwi iwitatamaniwise. <sup>4</sup> Amisaiwi osinihiya mwaaya maatiya amisaisatoyaisangi bimaawihyaataawaawaahimanyinya kiya osinihiyaisi iwitatamaniwise. Mwaaya maatiya amisaisatoya kiya Autaahaatihopi giwunyaahohitihandi nunjawi jihikiya sawanaami saniya sapiyaisuni aunihiya saisatoyaisi iwitatamaniwise. Saiwi iwitatamaniwi kiya sangihyaatihihura kawisohiwaiwaapinapimapi wihoaanjihapa saniya sapiya amisaisatoyaisikawiwise. Ami sandikiya saiwi kiyohiwiwaapi Autaahaatiho maaritataise komigwinyapesirihireti kiyauho.

<sup>5</sup> Asihya osinihiya isihya kiyaisi iwitatamanitaatiwihya apipaahi owehiya saitaapo, Autaahaatihopi andititipi giwunyaapi kiyaami ndiha nehi komihetihiniyonihitapihaati apatihikiyaanihi kiyaisi Autaahaatiho owetimbipawapnunyati iwitatamanitandigiwusepinunjepigaapunditaapo. Asihya siya saisaihihiyaisaahihi Autaahaatihomi isihya usoniwi ikwiri nunyawiwitatamaniwise. <sup>6</sup> Iyataati amiasihya osinihiya kiyaami ambipatisipi nehi sawanaapaahihi mambihaiwakahapaamapipa gaahaiwaapaahiyohiyihya siya bindawaahandi

kandi Autaahaatihopi gimaawunyaapi nanipimatohitihanda aimi napomawaahiyaare. Isi siyaisi Autaahaatihomi isihiya windi maawitatamaniwise. Apipaahi owetane. <sup>7</sup>Sandi winihapimba kahitohipimba Autaahaatihomi isihiya kinyi winjatinihi otitih bimohiyihiyaisi nunye, kiya nepi japepihirito. Japepihirisaihi piwiha wapa isihiya usa nepi yawutaapi ikwiwitaatiwihapa kiyaamiheti windi ahimotito. <sup>8</sup>Iyataati ami isihiya usa isihiya sawanaamihiyaisi windi maawitatamaniwi ami kiyaami anjipipih kiyaami ikwiraatih deti bimohiyihya apwaatiya manyinyaisi windi baiwi iwinjatiwi maawitatamanohiyihya siya kiyaami Autaahaatihopi giwunyaahohitihandi nepi noasawi namapi isihiya Autaahaatihopi windi gimaawunyaapihiyaisi nusatipapi apipaahi maipihyaare.

<sup>9</sup>Asihiya osinihiya Autaahaatihomi isihiyaisi ikwiri nunyaw iotipipati kaitaatiwuni ami Autaahaatihomi isihiya kiya osinihiyaisi iwitatamanitandihaiwa numwitaatiwi osinihiya setahiyaami ambipatihih jipatipaiwise, kiyaami kinaungwiha 60 kiyati metaahi aunihyaami ambipati nepi utipihoaatih ahiyawise. Iyataati osinihiya siya woho nehi naaso naasoaisaahih namaatiwihyaatane. <sup>10</sup>Aiwi ami kiya wapa gaahaiwa kiyohiwaiwaapi ambipati nga noapati autaahi ahotahiyaatane. Kiyaami ambipati nga autaahi ahotindindi kimaiwa kiyohitihandapitane, manyinyaisi namoyaapi baiwi yamaniwi kiyaami ambipatapihapauni maarihophihapa mmoniwi nepunyawihyaatanihe. Aiwi ami isihiya aunahipati witaahapihiyaisi kiyaami anjipipih numwaapi iwitatamanihyaatanihe. Aiwi Autaahaatihopi giwunyaahohiyihiyai kiyaami naahutarihiri nepi nusaititaatiwiho waapoho mbwaaho nepunyambiwihyaatanihe. Aiwi isihiya nopisasiniwi binyaihihiyaisi ikwiri nunyaw iwitatamanimbihyaatanihe. Aiwi ami kiya otipipati gaahaiwa kahatamatipetahaiwaatih kiyaami ambipati nesi nandaapi katihi bitotawa kaiwihyaatanihe. Asihiya saiwi setahiyaami ambipatih utipihoaatih ahotati jipatipindane, Autaahaatihomi isihiya mmoniwi iwitatamanitaatiwo.

<sup>11</sup>Ami osinihiya apwainiyihyaami ambipati windi jipatipaiwi ahimotane. Owetane. Ami kiya namaatitaatiwihandapi maariho windohonihi Kiraisi Jisaasihomi otipipati kaitaatiwi nehohipati namasi nutaapo. <sup>12</sup>Ami saiwi namasi nowaawi amitiha maariho naanawisa mimaipaiwi jinjahira waati gwinyaawaatitauhihandapito. <sup>13</sup>Iyawaawi ami kiya maariho gaatonih tariwaiwi otipipa kaiwi anjipipih wapihi wapihimapi isihiyaisi mausopi nehi kiyaisi bipi ahiyaw nepi ipiho nehihaiwa nepi pititaatiwapi ami piwiha usaamihaiwa natipi nepi isihiya usaametirihiretapi katiwi itipihomataiwi isipi daayawaayopo. <sup>14</sup>Aihi nini namati osinihiya apwainiyihya namaatiwi sihimwaamoyaapise ndaato. Sihimwaamoyaapi manyinyaisuni warisaisi iwitatamaniwi

iwinjatiwise ndi nisi maariho gwinyaahohitihandi kandaato. Kiya saisaihi nyahi Autaahaatihomi isihyaanapi nyami isihya tiworisa piwiha maipihaiwa wapa nepi nanyopisasawi kamaatito. <sup>15</sup>Sandi nehihandi nini kandaamaato. Osinihiya apwainyihyaami usa Kiraisihomi otipipati kawitaatiwi nehohipati namasi aimi Bwaasirihiri nuwi nuwipinjauhi nini mmonataati kandapi kandaato. <sup>16</sup>Ami itapaati Jisaasihopi giwunyaahaati waati asihya osinihiya kaatamihiya usaisahaatindaataahi kiyaisi sawahaami iwitatamanati winjatane. Siya osinihiyaisi kaati neti Autaahaatihomi isihya iwitatamaniwi iwinjatito tati gwinyaati kiyaami ikwiraatihi ahiwisati Autaahaatihomi isihiyaisi naanhandi windi namunyane. Owetane. Isihya iwitatamaniwi iwinjatitaatiwihiya apipaahi owehiya asihya osinihiya nehi sawanaahi bimohiyihiyaisi Autaahaatihomi isihya iwitatamaniwi iwinjatito.

**Awaisawihya Autaahaatihomi Isihiyaisi Iwinjatohiyihyaapi  
Gwinyaitaapihaiwa Nini Kahititandiyo**

<sup>17</sup>Awaisawihya Autaahaatihomi isihiyaisi iwinjatohiyihya otipipati waati pihitiwi kiyaami ambipati dawaaho yaawahandi nga kiyohiyihiyai sahi Autaahaatihomi isihyaati nawiho baiwi nunyawise. Siyawaawi ami awaisawihya Autaahaatihomi piwiha ausaapi kaundiwi ami katiwunjohiyihiyaisi sahi nawiho nunyawwi kaitaatiwihandapi windi nanipimimatiwi baiwi nasisoaari gwinyaapise. <sup>18</sup>Iyataati otipipati kiyohiyihyaapi gwinyaitihaahandapi Autaahaatihomi piwiha wiwa sata ahotise:

“Maasapiho kauho isihyaapi nandapa woyihaamatetahapa witihandami yandipihohi awasaho tamitatetapi nahoti auhira itipiwati pasaapataati wapa neti nanihonihohi komi maahomwaaŋi windi nepi namaawisapupwe. Ko kinyi otipipati kahisataisi kopihapa gaasi neti nanane,”

tise. Iyataati ami kaiwaami wa satise:

“utaaho otipipati kaisiho nawiho titihi nene,”

tati Autaahaatihomi piwiha ahotise. <sup>19</sup>Awaisiho wo Autaahaatihomi isihiyaisi iwinja bimonihopi piwiha gisi atihohimati ko titihimetahaiwa kaise tati noaipahoniha kinyi atimbi namepe. Owetane. Ami isihya yahurisangi muri moaisangi piwiha ko titihimetahaiwa kaise tiwi katisaihaahihi kinyi atimbi nepi mmome. <sup>20</sup>O ami ko maipihaiwa akitinihi kiyonaahi Autaahaatihomi isihyaami ndiheti auta koaisi winihundi itihunde, kiya mmonawa yaiwi anini bitoaito.

<sup>21</sup>Autaahaatihomuni Kiraisi Jisaasihomuni yamahipataatihapi Autaahaatihomi otipipatihiya awaisawihyaamuni ndiheti isihiyaisi windi mmopi nepimusosapi nahatiyaisi naasaipiti kati kawimbi winihapipa kahitohipimba japepihiritaapi gisi nini piwiha apipaahi watipihaha

kahitataato. <sup>22</sup>Isihiya usa Awaisihomi otipipati nepi kataatihi nandaapi bitotawaawi kaitaatiwi gwinyaasaihihiyaisi kinyi keti ikwiri ahiwisapi Autaahaatihomi watipihandi ami gaahandi keti kiyai kinyi namunye. Jihi mmonipi gwinyaaposapi sandi kaima ami kiya ipoti maipihandi kaisaihi ami ikwiri ahiwingitihanda kiyaami maipihandi kinyihandimatitaiso. <sup>23</sup>Kinyi timbaimbi ami kinyi gwisaha maipitati nangopisasinjitihandapi nehi waapoho namihaapi wainihandi masimasihonya wonya nanime kinyi gwisahaatihi timbipa nemaito.

<sup>24</sup>Maipihaiwa isihiya usa kiyohiwaiwa auta ahondaise ami piwihaapi sangi nesi nuwi sangi tipitapaapi mmonihauhisangiso. Ami maipihaiwa usa kiyohiwaiwa nehi ipoti wura ausaimaninjiji isihiya ndihaara mmonawaayopo. <sup>25</sup>Isi ami kiyati gaahaiwa isihiya kiyohiwaiwa auta noaipasahi nga mmonawaayopo. Iyataati wapa gaahaiwa biyati motinjipaisangi windi otihi namoasanditaise.

### **Otipipatihiya Kiyaami Awaisawihiyaisi Kawitaatiwihapaapi Katitandiyu**

**6** <sup>1</sup>Isihiya nehi otipipatihiya Jisaasihopi giwunyaapihiya kiyaami awaisawihiyaisi baiwi usopi nepi autaahi isipi piwiha atiwiwi otipipati napaitiwi kawiwise. Kiya saisaihi isihiya Autaahaatihoaisuni komi piwiha newaati isihiyaisi katawaunjohihai nepi nopisasiwi maipihaiwa windi kamaatito. <sup>2</sup>Aiwi ami isihiya nehi otipipatihiya kiyaami awaisawihiyaya Jisaasihopi giwunyaapihiyaatanaahi kiya satiwi windi samaiwise, “nyami awaisawihiyaya Jisaasihopi nyamataiwi giwunyaapihiyandaati kiyauni ami nyahuni nauratetahiyaanine. Nauratetahiyaaninisi kiyaisi nyahi biyaati usonaati autaahi iwiwataati kiyaami piwiha atiwisaati otipipati napaitaati windi kamawitaano”, tiwi kiya windi katiwi kamaiwise. Owetane. Kiya windi samaiwi metaahi kiyaami awaisawihiyayaami otipipati napaitiwi awaindihandi kawiwise. Ami saiwi kiyaami otipipati kiyohiwaiwaaraahi ambipati iwitatamanitandihaiwa nehohiyihiya Jisaasihopi giwunyaapihiya otipipatihiya maariho nunyohiyihiyaaso.

### **Isihiya Isihiyaisi Asireti Katiwunjojhiyihyaapuni Ami Nawihoaaisi Maariho Apipaahi Nunyohitihandapi Piwiha Katitandiyu**

<sup>3</sup>Saiwa nahatewa gisi nini kahitohiwiwa kinyi isihiyaisi katipunje. <sup>4</sup>Ami isihiya usa isihiyaisi piwiha wiwa wipetahaiwa katiwunjawi, ami nyami Awaisiho Jisasi Kiraisihomi piwiha akaaha nahata nemapi, ami nyahi Jisaasihomi piwiha katanyasihi daayohirihiretapi pohipiyohiyihiya siya isihiyaisi kiyaami katiwunjojhiwaiwaami tanyaaha windi mopi apipaahi nehihandi genanawaayopo. Isihiya siyohiyihiya kiyaami omanjititih piwiha isihiya usaisawi wapaapi

itihinniwi tundaatiwihandihihiki kurimwindahiyaare. Aihiki sandiki kurimwindindindaatihapiki isihiyaapiki manditipaiwiki itihapipiki nunaaha isihiyiki usaametirihiretapiki piwihi sisipihitiwiki katiwiki amiki kiyaami omanjititihiki isihiyiki usaapiki apipaahiki maipihaiwiki gwinyaitaatiwihaiwiki noaipataise. <sup>5</sup>Iyati amiki isihiyiki siyiki kiyaami amitihi saamipihiki nanatiki owetati amiki piwihi akaaha nahata winki kimwaurimwindahiyaamihetapiki itihapipiki jinjapihiki mwitewiki isihiyiki usaisawiki itihitindaatiwihaiwiki noaipataise. Iyataati amiki kiya nehi sawanaami gaahaiwiki otaatapihaiwiki gwinyaapiki kiyohiwaiwapaiki kiya satawaatopo: “Nyahi gaahaiwiki kiyaatiki isiwatahaayoni kaiwetapiki ikipipiki nawiho waatiki nga noaipataise undaati isihiyaisiki katawaunjaatiki kiyaamihetapiki nyahi nawiho ikipipiki naitihaawo,” tiwiki asireti gwinyaawaayopo.

<sup>6</sup>Iyataati isihiyiki akitinihi gaahaiwiki Autaahaatihomihaiwapaahihiki giwunyaapiki kaiwiki amiki Autaahaatiho wapa kiyaami ambipatapihapiki numwimbipaapiki kimba gaaso tiwiki maaritiwiki nepiki isiwatohiyihiyiki siyiki aimiki nga ikipipiki taahipipaisawihiyaare. <sup>7</sup>Iyataati amiki nyahiki niyaami gwisahaatihapiki wapa nesi namoapawaatiki nehi taanahiyaaniniki yapimbataapihiki noaipawaahiyaanine. Siyaahiyaaniniki amiki napohaahuraisangiki nehi taanahiyaaniniki yapimbati namasi napowaatiki owetito. <sup>8</sup>Isi sandapiki amiki nyahiki nawiho ikipipiki taahipipiki owendaatiki nehi nyamiki ambipatapiki yutihiriki apotihiriki nandapiki ahotanaahiki gaasiki sapa kapa nanaatiki niyowiki namaasataatiki maarititihaawo. <sup>9</sup>Iyataati amiki isihiyiki ikipipiki nawiho naitaatiwiki anditiki napamahohiyihiyahiki nunjesitihandaatihiki timahiyawaayopo. Saiwiki kiya ikipipiki nawiho pihitiwiki naitaatiwiki anditiki napamahohitihandaahiki gimunyaatihaiwiki titihiki nusoaipatiki kiyaami ambipatiki maarihoai netiki yaawati, saiwiki nepiki nopisasiniwiki owetitaatiwihandaatihiki kiyaisiki numwaasiki notaise. <sup>10</sup>Sandiki isihiyiki nehi nawihopaahaiwiki maariho nunyawimahohitindiki maipihaiwiki nahatewaki kahatamatipetahaiwami daihira tanyaahaare. Isihiyiki usa nawiho nepiki ahoaitaatiwiki maaritiwiki maariho nunyawimawaawiki Jisaasihomiki piwihi akaaha nahata namapiki kiyauhiki kiyaami maariho nopisasinatiki yaawataise.

### **Timotehonye Kinyi Kiwahonyapihi Piwihi Nini Kahititandiyo**

<sup>11</sup>Amiki kinyihiki utaahonjiki Autaahaatihomihonjiki komihaiwapaahaitaapiki ahingihonjisiki isihiyiki mambihyaamihaiwaisiki ahosumwapiki namape. Aimbiki kinyiki anditiki napamapiki titihiki saasanotahonjimatipiki, amiki Autaahaatihomihaiwapaahaimbiki, amiki kopaahihiki baimbiki giwunyaapiki isihiyiki maariho nunyapiki, andititipiki bitotapiki yaasihaiwiki nangoaipahonihaiwiki yatihiki ipatisanipiki nepiki, amiki anjini napaisaatihonjiki bime. <sup>12</sup>Aimbiki kinyiki Kiraisihopiki giwunyaahingitihandiki sandiki isihiyiki wapa naitaatiwiki tusatipatiwiki nuhitotihandamatiyahande. Isi amiki sandiki ipipiki

gaahapa wapa ami naitaatiwi isohipatamatiyahandisi kinyi siri kireti Kiraisihopi giwunyaahingitihandi isipi ruhite, ami asitimatipi konjinihi jinjapihi jinjapihi bimitaapihandi naitaapo. Jih isihiya taahiyihyaami ndiheti Kiraisihopi giwunyaahingitihandi windi yamaambi andititipi auta katingura Autaahaatiho koaisapi jinjapihi jinjapihi konjinihi asohonji bimitaapihandi sandi nahimitandi gaatati nangimaasihonjiso.

<sup>13</sup> Autaahaatiho isihiya namoyaatiwi bimaami nutaatiwihandi ami kahapaamapipa namoyaataati ahotimi nutandihandi nunyati isiwatataise. Iyati ami Kiraisi Jisaasiho utaahe awaisiho Pondiyaasi Pairotihome ndiheti windi itiwa yamaayati, “nini Autaahaatihome Mwaahonine”, tati katise. Isi Autaahaatihome komi Mwaahomuni ndiheti nini waati winihititi gi sahitaato <sup>14</sup> Jisaasiho kata kaiwaiwaapiha piwiha kinyi nepi baimbi isipi japepihire. Japepihiripi isihiya kinyapi piwiha maipihaiwa kamaatiwihonji titihi saasanotahonji konjinihi mwitetipi bitopi numbwi, nyami Awaisiho Jisasi Kiraisiho auta noaipahonihuraatane hitataato. <sup>15</sup> Autaahaatiho sawaho asisiha timanati ahaisura koaisi neti awusaimanihonihi Jisaasiho auta ausaimanindaise. Iyati Autaahaatiho saiso apipaahi sawaho neti sanahiwiyati itatamaninani gaaho nehi naasohi sawaho autaahe isihiya nahatyaaisuni kahapaamapipa nahataapaisi iwinjatisihore. Iyati ami ko isihiya isihyaaisi iwinjatohiyihyaaisi iwinjatisihore. Iyati ami ko isihiya awaisawihyaaisi daahemwati nahatyaaisi Awaisihore. <sup>16</sup> Iyati ami ko napwitandihandi windi komiheti apipaahi ahimotati konihi bindataahore. Iyati ami ko ipihomi sisiha apipaahi watipi watipiha ndihai neti niyotiwitandihama otihatihi bindataise isihiya deti komihini windi namaitaatiwihatiho. Iyati mambihya isihiya koaisi apipaahi windi mausopihore. Ami wani maapi isihiya koaisi windi mausondaapo. Isi isihiya koaisi mepi autaahepumwahohitihanduni komi watipihandi kandinihi kandinihi ahotimi none. Akite.

### **Isihiya Ikipipa Nawiho Asaketahiya Autaahaatihopi Nanipimatiwi Isihyai Maawitatamanihopo**

<sup>17</sup> Timotehonye kinyi isihiya ikipipa mambihapa taahipipaisawihyaaisi saundipi winihunde, sahi ikipipa taahipipaisahyaaniniso tiwi autaahe wanaataapihi windi gemaananiwise. Aiwi saiwa nehi keti owetitandihaiwaapi nyangi nyatatamanitaiso tiwi gimunyaapise. Nehi Autaahaatiho wapa neti maapatisati nyahi maaritaati newa nandihahaiwa nahatewa nanyamishopaahihi giwunyaapise, undipi kaunde. <sup>18</sup> Aimb isihiya siyaisi isihiya nahatyaaisi iwitatamanitandihaiwa gaahaiwa kaiwi ami iparihiyaimatiwi kiyaami ikipipa maariho gaatonih isihiya ikipipa owehiyaisi nunyaw iwatatamanitaatiwi kinyi winihunde. <sup>19</sup> Saiwi gaahaiwa kaiwi iparihiyaimatawaawaahi ipotihura



kiyaisi neti iwitatamanitandihaiwa yamahipataatihi nepi ahoaitaapo. Aiwi ami maapi wanisangi sanahiwaiwi itatamaniwi nga tisaitiwi bimitaatiwihandi kiya akitinihi naitaapo.

### **Timoteho Komi Otipipati Biyati Jatitande**

<sup>20</sup>Timotehonye, Autaahaatiho komi piwiha kinyi ikwiraatihi ahaisiha kinyi nepi anitimbim baimbi isipi jatime. Aimbim ami isihiya usa kiyaami piwiha nehi mambihaiwa gimunyaata naharimatahaiwa nepi isipi kaniwi tunnihohiwaiwaapi satiwim, sa isihiyaanamim gwinyaitihaahandamim tanyaahaare tiwi katohiwaiwaapi kaanihim yandihim gi nawisapim bitose. <sup>21</sup>Sandim apaapimaahito, isihiya usa sandim nepi anitiwim isipi japepihrohiihiya nyahim Autaahaatihomim isihiyaaninim newa isiwatohitihandim namasim asiretim niyauhito. Nisim piwiha sa kaanihisi Autaahaatiho nasisoaari maariho asipaindihandim sangisatitane. Utipimandim kimandim nini Porihoninim jipatipiyataayo.